

KANUNUPE Kalaallit Nunaanni Nunaqarfimmiut Peqatigiiffiat

Oqalungiaat Ammaanersiornermi

Ataqqinartut ataatsimeersuariaqataasut , allallu qaaqqusat najuuttusi

Nunaqarfimmiut Peqatigiiffianni siulersuisut sinnerlugit nuannaarutigeqaaraa kiisami Nunaqarfiit pillugit ataatsimeersuarnissaq utaqqikatassimaqisarput piviusunngortoq ammarlugu oqaaseqarsinnaagama

Naluneqanngitsutut kingullermik 2006-mi Sisimiuni nunaqarfiit pillugit ataatsimeersuortoqarpoq, tassa ukiut arfineq pingasut matuma sionatigut, piffik akunniusoq takivoq taassumallu iluani Kanunupe-mit Nalakkersuisut suilii ukiut tullerit pingasut ilungersorluta qinnuigisarsimavavut ilumut Nunaqarfiit ataatsimeersuartinneqarnissaat annertuumik pisariaqartinneqarmat taamatut ingerlatsiniaqqullugit uagut suleqataajumaaratta, kisiannili uggornartumik tusaaniarneqarnerput annikissimavoq

Qinersinerup kingorna naalakkersuinikkut allannguisoqarpoq, aammattaaq malugivarput tusaaniarneqarneq pitsaanerulersoq, tamatumap malitsigisaanik ukioq kingulleq isumasioqatigiinneq Kanunupe-mit akileeataaffigisarput ingerlanneqarpoq, taassumallu isumasioqatigiinnerup malitsiganik manna ataatsimeersuarneq piviusunngorpoq, tamanna Kanunupe-mit annertuumik qujassutigalugulu nuannaarutigivarput

2006-mi kingullermik ataatsimeersuaratta nunaqarfinni innuttaasut nuna tamakkerlugu 9459 miss , savaateqarfiit ilanngullugit inoqarput, ukiut arfineq pingasut ingerlaneranni nunaqarfinni innuttaasut innutaasut ersarilluartumik ikileriaateqarput maana 7837-nik Naatsorsueqqissaartarfik malillugu innuttaqarmata, tassa 1622-nik inukillieriarpoq

2006-mi Nunaqarfinni savaateqarfiit ilanngullugit inuttaasunit angutit 5110-jupput arnallu 4349-ruullutik

2014 aallartinnerani innuttaasunit angutit 4251-upput arnallu 3586-ullutik tassa nikingassutaat takugutsigu angutit maanna 665-nik arnaniit amerlanerupput

Takusinnaasatsit annertuumik nunaqarfiit inukilliarporput aammalu ataatsimut isigalugu innuttaasut ukioqqortusiartorlutik, angutit nunaqarfinni najugallit arnaniit amerlanerungaatsiarput tamannalu ukiuni aggersuni inuttoqqussuseq eqqarsaatigalugu eqqarsarnartoqarpoq

Assilissap takutippaa taamatut ingerlaaseq atuutiinnassappat sulii ukiuni aggersuni Nunaqarfiit inuerukkiartornerat ingerlaannassasoq, tamanna nunani allani atuuttoq ilisimavarput , tassa najugaqarfiit minnerusut qimagarneqarmat

Isumaq pilersinnaasoq unaavoq Isiginnaaginnassavarput taamak inuerukkiartorneq? Imaluunniit arlaagut iliuuseqassaagut? Kanunupe-mit isumarput ersarituannarpoq

pisariaqartipparput iliuusissat assigiinngitsut nerrivimmuq qaqillugit siammasissumik eqqartorneqarlutillu oqallisigineqarnissaat, upperaarpur suli nunaqarfiit siunissaqarnerat, suli upperaarpur kivitseqatigiinnikkut pitsaasup tungaanut alloriartoqarsinnaasoq, taamaasiussagutta oqareernittut sukumiisumik iliuutsinik assigiinngitsunik tunaartaasinnaasunik iliuuseqarsimasariaqarpugut, tamannarpiaavorlu arlaagut ukiuni arfineq pingasuni amigaatigalugu qqaqittuarsimasarpur, tassalu tamatta peqataaffigisatsinnik iliuusaasinnaasunik siumut alloriaataasinnaasunik tikkuussinertalimmik oqalliseqatigiinnisarpur

Nunarsuarmi qeqertat annersaanni najugaqartuugatta sineriattoqaagut, siammasissumiillu aggerfeqarluta maaniippugut, qularutiginnigilara isummat assigiinngitsut nassarlugit maannga ataatsimeersuariarlusi aggersimassasusi, qularutiginnigilaralu ulluni tulliuuttuni oqallittarnissani ersarissunik oqariartuuteqarumaartusi Kanunupe-miit pingaartipparput nunaqarfimmiut uani ataatsimeersuarnermi tusarnaarneqarnissaat, programmi takugutsigu ullut tulliuuttut unuttalipajarlutik ingerlasartussaappur, aammalu oqallinnissanut periarfissiisutaasut killeqarlutik, taamaammatt kissaatigeqaara nunaqarfinnerisut ataqqineqarlutik oqallittarnissani salliutinniarneqarumaartut, periarfissat unatut ittut qaqtuguinnaq takkuttarnerat atorluaqqunaqimmat

Ulluinnarni inuuniarnerput sutigut tamatigut illoqarfinnut sanilliullugu akisuneruvoq, tamanna ilaatigut ulluni tulliuuttuni qulequttani assigiinngitsuni eqqartueqatigiinnissatsinni tikiinneqartussanut ilaassaaq, kisiannili qallikkut ilukkullu inooriaaseq assilissami ersertikkuminaatsuummat oqallittarnissani qanoq ilukkut inissisimanerput ersarissarneqartarumaartoq naatsorsuutigaara, tassami qularnanngitsumik illoqarfissuarni inuuneq, nunaqarfinnilu inuuneq annertuumik assigiinngissuteqarmata

Kanunupe-mit ataatsimeersuarnissami pingaartitavut naaperiarneqarsimammata nuannaarutigeqaarput, nalunngilarput piffissaq killeqartoq, aammattaaq nalunngilarput suna tamaat kiliorlugu ataatsimeersuarneq ingerlasinnaanngitsoq, kisianni isumarput malillugu siammasissumik ulluni aggersuni eqqartueqatigiinnissatsinnut periarfissaqarpugut, ulluinnarni atukkatta avammut saqqummiunnissaat pingaartissimavarput, aammali qanoq alloriaqqissinnaanermut tunngasut pingaartissimallutigit, taamaammatt angumerineqarsinnaasut pingaarnersiorneranni qulequttat assigiinngitsut ilanngunneqarsimasut iluarisimaarpavut

Kuulturitta tammattaalineqarnerani nunaqarfiit inisisimaffippur annertuvoq, qangaaniilli ileqqut ilaatigut sapanginneqarsimasutut isikkullit suli ullumikkut nunaqarfinni asigiinngitsutigit attanneqarpur, piffiit assigiinngitsut immikkuullarissutsumikkut takutitsiffiusinnaasarpur, aammali assigiinngissutsimikkut takutitaqarsinnaasarlutik allani ajasoorutaasartunik, isumaqarpunga oqatsitta ataavarnissaannut nunaqarfiit pingaarutilimmik inissimasut, aammattaaq inooriaatsip piniartuunermik kingoqqiffiusup ingerlanneqarfiani suli pingaarutilimmik

inissimasuusut aammalu sulī atorluarsinnaasariaqakkavut ulluinnarni inuiaqatigiinni inissimaffitsinni

Upperaarput ataatsimeersuariartut ersarissunik oqariartortarumaartut aammalu upperalugu suut ulluinnarni inuuniarnitsinni sakkussatut pisariaqartitavut pillugit ersarissunik oqariartortarumaarnissaat, tassami innuttaaqataasutuulli allatut pisariaqartitsineq nunaqarfinnissaaq malunniuttarmat, ilaatigut periarfissat killeqarnerat ersarissisarmat kissaatiginarsisarlunilu inuunerinnissap tungaa eqqarsaatigalugu, aammalu peqqinnarnerusumik inuusaaseqarnissaaq eqqarsaatigalugu sulī piorsagassaqartoq pingaarutilinnik

Kanunue-mit qilanaarpugut ullut tulluittut ingerlanissaannut oqallinnissanut assigiinngitsunut, aammali pingaartipparput uani ataatsimeersuarnermi oqaluuserineqarlutik siunniunneqartut malitseqartinneqarlutik malinnaavigineqarnissaat tamanna erseqqisaarsimavarput Naalakkersuisunut siusinnerusumi misilittagaasut eqqarsaatigalugit, malitseqartitsiffiusumik una ataatsimeersuarneq ingerlanneqartariaqarmat

Naggataagut sorpassuarnik kalluaanngikkaluarlunga innersuulluguli qulequttat assigiinngitsut tikittarumaakkavut pillugit, kissaatigaara ataatsimeersuarneq una tamatsinnut pissarsiffiullunilu oqalliffiulluarumaartoq, aammalu siunnerfissanik pitsaasunik pilersitsiffiujumaartoq, ilanngullugu qujaqqikkusuppunga uumap ataatsimeersuarnissap piviusunngortinneqarnissaanut sulisimasunut tamanut ataatsimeersuarluarisi oqallilluarisilu